



PARLAMENTO DI KÒRSOU

Parliament of Curaçao • Parlamento de Curazao • Staten van Curaçao

Na Presidente di Parlamento di Kòrsou
Señora A. Pauletta
Wilhelminaplein
PRESENTE

Willemstad, 3 di ougùstùs 2020

Tópiko: Reunion di Komishon Sentral urgente riba e atrako brutal di Gabinete Rhuggenaath, Curoil, Aqualectra i BTP&U riba pueblo di Kòrsou ku subida drástiko den preis di kombustibel, awa i koriente

Señora Presidente,

Ta insolító lokual ku nos a konstatá e siman aki, kaminda ku Gabinete Rhuggenaath forma pa PAR i MAN ta disidí di masakrá Pueblo di Kòrsou i ku for di dia 4 di ougùstùs 2020 ta drenta na vigor un oumento drástiko di preis di Gasolin, Diesel, Gas, Koriente i awa. E asunto aki ta insolito, debí ku preisnan di e derivadonan petrolero na e momentonan aki a bolbe baha. Pues Pueblo di Kòrsou mester a haña un bahada den preisnan, na lugá di un subida.

Pero lokual ku nos ta wak atrobe, ku ora ta toka e Pueblo di Kòrsou, BTP&U, Curoil, Aqualectra i Gabinete Rhuggenaath no ke duna pueblo e bahada ku e meresé. Nan a inventá un maldito “Fuel Supply Garrantee 1A” i “Fuel Supply Garrantee 1B”, esaki ku e mentira ku dor ku NO a haña un operador pa start manchá nos refineria mester bin ku e rekargonan aki.

E rekargonan aki riba gasolin ta mas o ménos 45 sèn pa liter i riba diesel e ta 65 sèn pa liter. Ku otro palabra un belasting skondí ku ta mesun karu ku e preis di kompra di un liter di gasolin i e ta un i mei mas tantu ku e preis di kompra di un liter di Diesel, esaki ta inakseptabel.

Na e momentunan aki, despues di COVID-19 ku hopi hende a pèrdè trabou i hopi siudadano ta lucha pa tene kabes riba awa, ta dal e pueblo aki asina duru den nan saku. No papia mes di e shofùrnán di bus i konvoi ku awor mester bai paga mas karu pa e Diesel ku e ta usa den transporte públiko. Ku e belasting skondí aki, gabinete Rhuggenaath ta hisa kosto di bida innesesariamente.

Hasiendo uso di artíkulo 33 di Reglamente di Orden di Parlamento, nos ta pidi bo pa konvoká un reunion urgente riba e tema aki pa nos por debatí i konkluí kiko nos ta bai hasi pa stòp gabinete Rhuggenaath di masakre Pueblo di Kòrsou.



PARLAMENTO DI KÒRSOU

Parliament of Curaçao • Parlamento de Curazao • Staten van Curaçao

Frakshon di MFK ta pidi pa invitá na e reunion aki Minister I.S. Martina i Minister Z. Jesus-Leito enkargá ku BTP&U. Pa medio di esaki nos ta pidi presidente di Parlamento pa promé ku e reunion pone tur dokumento relevante promé ku e reunion tuma lugá, pa asina nos por debatí i ta mas efektivo den e reunion aki.

Atentamente,

Charles Cooper

Jacinta Constancia

Gilbert Doran

Juniël Carolina